

Holiday Inn celebrando 50 años y no a cambia di nomber nunca

Skirbi pa: Dufi Kock -Escritor y historiador

Awe Diabierna dia 25 di October, ta net 50 años pasa cu nos isla a conoce un otro hotel luhoso na Palm Beach. Riba e dia aki, Gerente General di Hollandse Bank Unie N.V., Sr. J. J. van Thiel, acompaña cu e hoben Vlietman, oficialmente a corta e cinta pa asina habri hotel Holiday Inn oficialmente, poniendo asina 209 camber extra na Aruba su industria turistico. E cambernan nobo aki a dorna e silueta di Aruba su Palm Beach. Mas di 600 invitado a asisti na e ceremonia di habrimento y despues cu un fiesta di cocktail. Entre e invitadonan tabata presente: Minster President Sprockel. Pastoor Erkamp, den nomber di Mgr. J. Holterman, directornan A. Jesurun, B. Jesurun, M. Vlietman di Aruba Real Estate N.V., kende ta doño di e hotel y Karl Franck, "Innkeeper", Dirigentenan di Holiday Inns America Inc. cu tambe tabata presente pa e ocasion.

Observando pa prome bes e becindario di e hotel tabata oficialnan di tur nivel di gobierno tanto di Aruba como di Corsou, y representantenan di comercio y industria. Un huesped special tabata Vice Prome Minister di Hulanda, Sr. J. Bakker.

Holiday Inn cu a wordo construi na un costo di 11 milyon florin, tin varios "prome" den negoshi local di hotel. Su construcion a keda completa den un tempo record di un año, 23 di October 1968 te 22 di October 1969. Holiday Inn tabata e prome hotel di luho financia cu placa priva y prome pa pone un aparato di television den cada camber, y un mashin cu ta traha bloki di ijs na cada di un di su siete pisonan. Pa e huespednan cu nan mes kier a laba nan paña, tabatin un laundromat cu nan mes por a usa na di siete piso. Por ultimo, Holiday Inn ta e unico hotel aki na Aruba cu nunca a cambia di nomber.


Otro prome, ta e careda di pacusnan na e piso abou, cual ta 180 pia largo y 25 pia hanchu. Den e centro di compras aki tin un botica, joyeria, pacus cu ta bende electronica y kodak, pacus oriental, pacus pa articulonan di homber, boutique pa damas, oficina cu ta organisa tours, salon di beyesa, y agencia di banco. Entre otro facilidatnan tabatin Bon Bini Coffee Shop, Palm Beach Room cu ta un cabaret, Oranjestad Banquet Room, piscina y Bar Oasis banda di piscina. Fuera di tur esey, Holiday Inn nobo ta luga di Aruba su di tres casino, esun di mas grandi y mas bunita di Antiyas Hulandes, segun Sr. Vlietman di Aruba Real Estate N.V.

Aruba su hotel di mas nobo ta carga number 1150 den e cadena di hotelnan Holiday Inn rond mundo, cu ta creciendo rapidamente.

"Nos a caba di ricibi aviso oficial di Memphis, Tennessee, cu esey ta Aruba su number oficial", asina posadero Karl Franck a bisa un representante di Lago su departamento di PR/IR algun dia prome.

Den un entrevista cu Albert C. Eman, hefe di Comunicacion na Lago, e tempo ey, Sr. A. Jesurun a menciona plannan pa traha mas hotelnan di Holiday Inn na St. Maarten y Boneiro. "Cu un hotel na cada isla, lo ta posibel pa ofrece pakete di biahe pa Antiyas", asina el a bisa.

Si nos compara nos turismo awendia, nos por bisa cu binimento di tur e hotelnan luhoso di piso cu nos tin na Palm Beach, ta un muestra cu nos isla ta sigui ta desayorando como un isla favorito pa hotelnan luhoso. Esaki un bes mas a demostra cu nos isla, chikito cu e por ta, ta bon escogi pa doñonan di hotelnan renombra den exterior. Cu e habrimento di e boulevard, a duna e oportunidad pa sigui desaroya e parti aki di nos isla.



Cu habrimento di nos prome hotel na año 1959 y e crecimiento den nos turismo indudablemente a duna e confiansa na esnan cu kier a bin establece nan negoshi aki. No tin duda cu nos turismo a sigui crece, danki na nos hendenan cu diariamente ta contribui cu nan manera servicial di traha, y e amabilidad brinda na cada turista cu bishita nos isla y cu a lo largo a crea e repeticion di nos huespednan. Durante mi investigacionnan, mi a repasa masha hopi "reviews" di diferente hotel y restaurant, ta increibel pero ta comentarionan positivo so bo ta haya.

Actualmente, un bes mas nos pilar economico ta nos turismo, pero nos no por tuma ningun riesgo pasobra turismo ta un negoshi hopi delicado. Pesey ban nos tur sigui ofrece nos sonrisa y nos amabilidad na nos turistanan. Nos tin tur e ingredientenan cu por contribui na nos turismo cu indudablemente lo sigui engrandece e desaroyo economico y social di nos pais.